

“Roek It” Ciet Lwgnyez Angqyangz

快乐的“六一”儿童节



Ngoenzneix dwg “roek it” ciet lwgnyez. Gyanghaet, dou byaij haeuj ndaw hagdangz, daengx hagdangz cungj dwg geiznding vahnj, gizgiz cungj dwg sing riu, gyoengq doengzhag bouxboux cungj angqvauvau.

Gyoengq doengzhag buen aendaengq, comz youq ndaw cauhsangz hagdangz, angqhoh aenciet swheij.

Hoih angqhoh hainduj lo, bouxcujciz cingsaenz gvaekgvaek byaij hwnj gwnz daizheiq cujiz cizmuz. Biujyenj cizmuz hainduj lo, miz ciengqgo, miz diufoux, miz siujbinj…… ndawde gou ceiq maij haenx dwg daeggo dahcej roek nienzgaep cuengqsingdoeg seigo haenx, gyoengqde gig miz gamjingz bae doeg, sawj gou cungj dingq haeujmaez lo.

Gwnz daiz biujyenj cizmuz gig ndeiawj, laj daiz sing bekwngz mbouj dingz, hoih angqhoh itcig hai daengz banngaiz cij sat. Gyoengq doengzhag cungj caengz yawj gvaqyinx, gij singriu gyoengq doengzhag lij rwenz youq ndaw hagdangz. Daihgya cungj maqmuengh “roek it” ciet lwgnyez bimoq vaiq di daeujdaengz.

(ngaih nienzgaep Vuz Mingz)



贵港市覃塘区蒙公乡凌寺小学三(1)班 覃钰钦

Ranzmbanj gou youq Gveigangj, gizhaenx gingjsaek gig gyaunde, va mak homfwd, bya heu raemx saw.

Seizcin, gomak oknyod lo, vadauz hoengzyanyan hai va lo, valeiz hausaksak hix hai lo. Rumzein ci daeuj, goliux youq henz dah iq couh lumj dahsau gyaunde nei cingq menhmenh roi gyauej de.

Seizhah, ndaw mbanj gomak maj ndaej mwncupcup. Duzbid youq gwnz ngefaex mbouj dingz dwk heuh. Gyoengq bouxlaux youq laj gofaex aeuliengz ganggoj, gyoengq lwgnyez couh bae daengz diuz dah iq sawndikndik haenx dajcaemx guh'angq.

Seizcou, aenmak cug lo. Daihgya nyaengq dwk sou lwgmak. Seizneix danghnaeuz mwngz daeujdaengz aenmbanj dou, dou itdingh aeu gij mak ceiq ndei haenx hawj mwngz gwn gaeuq bae.

Seizdoeng, mbawfaex henj lo, raq rumz ci



daeuj, mbawfaex daj gwnz gofaex foenfoen loeng roengzdaeuj, couh lumj duzdud mbungqmbaj yaeng'yaeng mbin dwk.

A, ranzmbanj gou geijlai gyaunde! Gou gyaenz ranzmbanj gou!

(指导老师:覃福奇)



Suenbyaek Daxbuz

奶奶的菜园

南宁市武鸣区锣圩镇英圩小学四(一)班 廖保佳

Baihnaiz ranz gou miz aen suenbyaek iq ndeu, ndaw suenbyaek daengx bi seiggeiq cungj maj miz byaek, neix couhwdg aen suenbyaek daxbuz gou.

Buz gou bineix 80 bi lo, daengx ranz gou geij bi gonq gaengq buen bae ndawsingz youq, hoeng buz gou dailix mbouj haengj gaen bae, de naeuz: “Lajmbanj hoengheiq ndei, gwn byaek singisien mbouj miz nungzyoz uqlah. Caiq gangj gou sij mbouj ndaej suenbyaek gou.”

Daxbuz haet daengz haemh cungj youq ndaw suenbyaek nyaengq gvak namh、dwk bwnh、rwed raemx、gaj non…… Gij byaek noix bwnh, daxbuz couh rap doengj bae daengz ranz ciengx mou daek aeu bwnh haemx mou daeuj dwk. Ndaw suenbyaek ndaem miz gak cungj gak yiengh byaek, byaekbohliz、byaekbohcai、byaekgat、duhnoh、lwggwz、lwgbien、makyungz…… Seizlawz ndaem gijmaz byaek, go' byaek lawz maj geijlai ngoenz, daxbuz cungj rox, ndaw suenbyaek coengzlaiz mbouj hoengq gvaq.

Daengz ngoenz singhgiz, dou daengx ranz vnz ma lajmbanj, daxbuz couh angqvauvau bae ndaw suen aeu byaek youh oiq youh ndei gwn haenx ma hawj dou gwn. Yaek dauqma ndawsingz, daxbuz youh cang baenz daeh hung byaek hawj dou.

Byaek ndaw suen gwn mbouj liux, daxbuz couh dawz bae gai, gyoengqvunz cungj haengj cawx byaek daxbuz, mizeiz daxbuz lij soengq ndwi hawj vnz dem, byaek okfwngz le, aennaj daxbuz riu lumj dujva ityiengh.

(指导老师:廖永恒)

Siengjniemh Gwzming Senhle

缅怀革命先烈

环江思恩镇人和小学 六年级 莫小满

Laj dinbya baihnaz hagdangz, miz aen moh ndeu, seiqhenz moh yungh rin seiqfueng caep baenz, baihnaj moh soengz miz song aen beimoh, neix dwg aenmoh gwzming lezsw Luz Yilungz daxgoeng.

Luz Yilungz daxgoeng 1930 nienz seng, dwg vnz Vanzgyangh Sw' wnh Cin Mbanj Yinzhoz. 1951 nienz, Luz Yilungz daxgoeng 21 bi couh camgya Cungguk Yinzminz Gaijfangginh, camgya gvaq hoenx caeggeq, de hoenxcienq maenh'ak, baez doek baez laebgoeng. 1957 nienz,

de gvanghyungz dauqma ranz lo. Dang bing dauqma le de youh dang minzbingh yingzangj, mboengqhaenx lij miz mbanj caeggeq lamqlw, de youh daiq vnz caeuq caeggeq lamqlw doxhoenx, gaeb caeg seiz boihseiz deng bikmax nyingz deng, gvanghyungz vutmingh lo, doeklaeng guekgya nyinh de guh gwzming lezsw.

Bineix ngoenz ciet cingmingz banringz, hagdangz dou daengxgyoengq lauxsae caeuq hagseng gwed vagien, yamqdin naekcaem youh caezcingj daeujdaengz aenmoh Luz

daxgoeng sauqmoh. Ndwn youq naj moh, daihgya caemdingh nyinhcaen dingq Luz Gaivanz lauxsae lwnh gij goj Luz daxgoeng lij lix seiz baenzlawz maenh'ak hoenx caeggeq. Gij ciengzmienh hoenx caeggeq haenx youh yienh youq baihnaj dou. Dingq gij goj neix, dou cungj nyaenx mbouj youq lae raemxda lo. Luz daxgoeng vihliux baujhoh guekgya, vih hawj yinzminz saedcej gvaq ndaej an'onj vuenyungz, de baenz coz couh vutmingh lo.

Raeuz ngoenzneix ndaej gvaq saedcej vuenyungz, dwg gwzming



senhle youq gwnz cancangz buekmingh aeu ndaej baez youh baez swngli, doeklaeng vut sengmingh swheij vuenh daeuj. Raeuz guh boux hagseng, wnggai geiqniemh gyoengqde, ciepswnj gij gvanghyung conzdungj gwzming lezsw, raeuz yaek roengzrengz doegsaw, vih saedyienh Cunghvaz minzcz fukhwng bae buetguh.

(指导教师:覃月素)